

Yizcouh: 8 Ngoenz Gyaj Gungh Ciep Hekyouz 27.64 Fanh Vunzbaez

10 nyied 9 hauh, Yizcouh Gih Vwnzgvangdijlijiz naeuz, duenh ciet gozging, betcibngux neix, aen gih neix gak aen gingjdenj daeuz, gingjdenj lajmbanj daengj gungh ciep hekyouz 27.64 fanh vunzbaez, lijyouz cungj siuyungh 1.126 ik maenz, neix roengz giek maenh hawj geiqdoh daihseiq lijyouz caiq hwnghoengh.

(Cinz Fanghshw)

►Gyoengq hekyouz youq ndaw ginggih youz.



▲Gyoengq hekyouz comz youq gwnz daiz yawj gingj.

Lungzswng: Nazmbaeklae Yinx Hekyouz Daeuj Yawj Lai

10 nyied 3 hauh, duenh gozging ngoenzgyaj daihsam, vunz daeuj youz Lungzswng Gak Cuz Swciyen aen Ginggih Nazmbaeklae Lungzciz lailai, ndaw ginggih nazmbaeklae baenzgyaek baenzgaiq doxdaeb, haeuxnaz homswdswd, mok heux gwnz ndoi, yinx gyawj fanh boux hekyouz daeuj yawj gingj, daeuj guhcaemz, daeuj yawj yienghsiengq ndaw mbanj, angq gvaq ciet gozging.

(Vuz Swnghbinh)



▲ Vunz byaij gvaq gyang naz ndeiyawj lailai



Yungzanh: Ranznden Ndaw Segih Guhdaih Angq Gvaq Gozging

10 nyied 5 hauh, Yungzanh Yen Sinhminz Segih guh hozdung comz yienj cezmuz. Baez hozdung neix cingj vunzlai daeuj guhdaih caemh angq, doxcamnai doxgangjgoj, doengzcaeaz angqhoh Cunghvaz Yinzminz Gunghozgoz laeb ndaej 71 bi. Youq yienhciengz, sing riu mbouj dingz, bouxyienj haeuj daengz bakdou ranz vunz caeuz vunzlai doengzcaeaz ciengq go diuq foux. Neix yinx gyawj 1000 boux vunz henzgyawj caemh guh.

(Veiz Yungzginh)



▲ Gyoengq vunz ndaw segih yawj cezmuz le angqvauvau.

Yungzsuij: Mbanj Myauzcuz Gangq Bya Angq Gvaq Ciet



▲ Song dahsau Myauzcuz gangq bya nyaengq raeuh.

10 nyied 3 hauh, Yungzsuij Myauzcuz Swciyen Ganjdung Yangh Mbanj Myauzcuz Vahmah banh aenciet daihhaj gaiq seizcou gangq bya, vunzlai boq aenvenz diuq fouxcaijdangz, gangq byanaz caeuz gwn doxgaiq gyangdoengh daengj, baenzneix angqhoh bineix ndaej sou lai, angq gvaq ciet gozging.

(Lungz Dauh)